

che 'l sia bandito de Venexia et dil destreto et mia 15 *ultra*, con taia etc., et venendo li sia taia la testa, et li beni de la madre, fo da chà Barixan de Treviso, vengi *etiam* in li fioli de la dita dona amazzada. Et questa ave 10. Et fu preso parte posta per sier Mafio Girardo cao di XL et sier Nicolò Davanzago vicecao, et li Avogadori de Comun, che 'l dito sia bandito de terre et luogi con taia lire 1500 et di navili armadi et disarmadi et de questa città, et hessendo preso li sia taia la testa, et la metà di beni de la madre vengi a li fioli de la morta, *ut supra*. Questa ave 20.

Noto. Intesi, hessendo stà preso per il Conseio di X, uno barcaruol qual tragettava da Liza-Fusina a Venezia, per haver usato parole di mala natura contra la nobiltà, *ut in processu* etc., et questo la malina, sonandose una campana, domandò che campana era, uno li disse, sona la campana de maleficio per apicarte per la gola come tu meriti, el qual inteso, beveva con una grossa, la ruppe et se tagliò lui stesso le cane de la gola et morite. El qual tristo nomeva

Noto. Heri mafina se levò de sora porto la galla capitano sier Hironimo Contarini de Fiandra, et *etiam* poi la galla patron sier Giacomo Marzello, vene certa burasca, la capitania passoe de là et la Marcella restoe; *etiam* se levò la barza patron sier Pandolfo Contarini armada, va in Sicilia, per acomagnar le galie de Barbaria.

Da poi disnar, fo Conseio di X con la zonta, in materia de biave. Et prima fu preso, che alcuna nave nè navilio de bolte 200 in zoso se possi partir de questa terra et dil porto nostro senza licentia et bolletin dil Colegio de le biave, soto pena *ut in parte*, nè *etiam* del porto di Malamocco.

Fu posto, de far do proveditori per tera ferma, come altre volte, a far mandar le biave de nostri abitanti in questa terra de qui con pena, et per spexe ducati 100 al mexe, i quali fazano condur de qui formenti de chiese, ecclesiastiei etc. *Item*, posto scriver per le terre certa limitation: li rectori mandino de qui stara milia *ut in limitatione*.

Item, posto per sier Zuan Alvise Duodo consier, et sier Piero Trun cao di X stava sul preso per Collegio: che li rectori de le terre habino tal cargo, et per li castelli li podestadi, ai qual sia scritto per questo Conseio fazino la execution, con altre clausole. Et fo gran disputation. Parlono molti; et il Serenissimo per star sul preso; et questa fu presa.

124* Fu preso, dar doni a tutti quelli con furano for-

menti in questa città de teraferma, excepto de le tere et lochi nostri, *videlicet* per il mexe de avosto el staro soldi 15, seplembrio soldi 12, octubrio soldi 10, *videlicet* de Lubiana, Trieste, Fiume et altre parte de Alemagna, *item* de lochi dipendenti, Monferà et Saluzo et altri lochi de Italia, fuora de le terre nostre.

Fu preso, tuor da la Zecca ducati 22 milia per comprar formenti, *videlicet* recever a raxon 6 per 100, ubligar a la Zecca 10 milia ducati dil duca de Milan ubligadi ai proveditori sora i Monti, i qual promettieno dar questo marzo, et ducati 8000 dia restituir Calzeran Zopelo che li fo prestadi per comprar formenti.

Fu preso, che in Colegio per il Serenissimo sia richiesto a prelati, monasteri de frati, monaché, nobili et citadini nostri che hanno intrada, che vogli *immediate* far condur in questa terra formenti, et quello prometerano de far, fazi con vero effecto.

In questa matina fo fatto la commission a Zuan Dolfin rasonato, va a Milan per haver la trala de stara 30 milia formenti dal duca, pagando a quelli li venderanno etc.; al qual se li dà per spexe ducati 40 al mexe, meni con se et se parti di questa tera per Padoa, poi anderà verso Milan.

Item, per Colegio fu data la commission a sier Pandolfo Contarini patron de la barza va in Barbaria, qual se levò poi nona.

Noto. In questo zorno intesi, come a S. Agnese quel maistro che have la gratia et ha fato experientia de trovar, mediante uno pozo che 'l va con mirabile artificio, passà la cuora, l'acqua dolce, et cussi è stato da zorni . . . in tal lavor, et *tandem* heri trovò l'acqua dolce bona de là de la cuora, la qual resorze, et è andà soto da passa . . . et de la cuora in zò passa . . . ; cosa bellissima et de farne memoria eterna.

A dì 5. La matina, vene in Colegio sier Hironimo da Leze stato podestà et capitano de Feltre, vestito de . . . , in loco dil qual andoe sier Marco Loredan qu. sier Alvise, et referite iusta el solito.

Vene l'orator de l'imperador per cose particular de foraussiti, con letere de l'imperador che racomanda alcuni. Et poi disse de alcuni foraussiti non haveano hauto li soi danari a Padoa etc.

Vene l'orator de Anglia protonotario Caxal, per haver el possesso dil vescoado de Civald de Belun, rimesso aldirlo

Veneno molti zentilomeni et frati mandati per loro, a li qual per el Serenissimo fo persuasi a vo-